

TAMBU

Pa: EDDY BENNETT



Un di'e observashonnan cu ta visto pa tur hende cu ta bishitá e region di Caribe ta, cu e música di'e region aki ta ligá cu e instrumento di música cu nos ta yama tambú.

Nos sa cu e habitantenan original di'e islanan di Caribe, esta e Indjannan, a usa tambú den nan música. Pero si ta e mesun tambúnan nos ta usa awendia den nos música, esey nos no sa. Loke nos sa ta, cu den pasado miles di Africanonan a worde trasladá for di Africa pa e islanan di Caribe. Esakinan, naturalmente no a bini man bashí. Nan a bini cu tur nan herencianan cultural, loke ta encera nan instrumentonan di música, pues nan a bini cu nan tambúnan y nan música.

E tambúnan aki tabata e instrumento principal den nan música, pasobra esaki tabata un música basá riba ritmo y ta net e instrumento aki tabata marca e ritmo na tur manera. Esaki no kier men cu nan no tabata traha melodianan. Nan tabata usa instrumentonan di cuerda (un sorto di fió) y tambe nan tabata canta hopi.

Serca algun pueblonan di Africa nan tabatin te hasta un sorto di culto di tambú. E tambúnan tabata worde wardá den un casita especial y ningun hende tabatin e poder di bai saca nan sin haña castigo. Tabata prohibí pa hende muhé saca e tambúnan. Ta ún homber só por a hasi esaki, o sea e "Master Drummer"

Tur sorto di tambú nan tabatin. E herencia aki nos por ripará bon cla den nos region Caribe. Hopi sorto di tambú tin den nos region Na Cuba tin hopi sorto, na Haiti, na Jamaica tambe. Na Aruba, e música cu ta worde tocá akinan y cu nos ta yama "di nos", tambe ta ligá cu tambú. Aki mi mester hasi un exepshon si, pasobra nos wals y nos mazurka si nó ta ligá cu tambú. E otronan si.

Bo por imaginabo un tumba, un danza, tambú, dande, tocá sin un tambú aden? Bo contesta lo ta sin duda: "esaki ta imposibel". Cu razón. Tur nos músiconan lo bisa mescos. Otro sorto di música di nos region cu a dreña nos isla, tambe ta difícil pa nos toca sin e instrumento tambú. Imaginabo tur e salsanan, merengue, calipso, soka cadencenan, sin tambú. Esaki lo ta un música sin curazon.

Awor despues di'e exposishon chikito aki di tambú, nos por puntra nos mes con ta pará cu e tambú awendia. Si nos mes of un mucha, sea homber of muhé, kier siña toca e instrumento aki, na unda e bai? Na Muziekschool di Aruba of na e school di música di Adayma


sigur lo e haña un contesta negativo: "Nos no ta siña toca e instrumento aki". Tur otro sorto di instrumento si bo por siña toca na e schoolnan aki, exepto net esun instrumento cu ta e curazon di nos música.

Ta con e Africanonan tabata siña toca e instrumento aki anto? Wel, e hobennan cu kier a toca tambú, mester a bai serca e "Master drummer" pa siña esaki. E tabata scohe esnan cu tabatin e don pa toca e instrumento aki, y e tabata sigui duna nan les. Nos ta mira anto cu aya tabatin un sorto di school pa siña toca tambú.

Ta di con anto nos tin varios - no hopi - pero varios bon tocadó di tambú riba nos isla? Ta unda nan a siña toca e instrumento aki? Mi conocé varios hende muhé tambe di Aruba, cu por toca e instrumento aki hopi bon. Ta unda nan a siña toca tambú?

Lo ta bon pa nos tene un entrevista otro biaha cu un di nos mihó tocadónan di cuero, cu nos conocé bao di'e nomber di "Zogo", kende ta biba na Madiki. Podisé asina nos por bini na clá, ta con nos hendenan ta siña toca e instrumento aki na Aruba.

Te otro biaha !



PRIJS: Fls. 2,00

nos REVISTA

AÑA 1 — NO. 1

OKTOBER 1981



TÓPICOS:

UN CENTRO DI BARIO

IMPORTANCIA DI DEPORTE PA BO SALUD

CLUB HOLLANDIA

PAPIAMENTO NA SKOL,... SI of NO ?

HAF DI CONTAINER

ENTREVISTA EXCLUSIVO CU GLENDA HEK,... STEWARDESS